

小学生必背古诗词 80 首目录 + 古诗（3-15 页）

	作者	诗词名		作者	诗词名
1	汉乐府	长歌行	41	韩 翃	寒 食
2	曹 植	七步诗	42	韦应物	滁州西涧
3	北朝民	敕勒歌	43	卢 纶	塞下曲
4	骆宾王	咏 鹅	44	孟 郊	游子吟
5	贺知章	回乡偶书	45	刘禹锡	竹枝词
6	贺知章	咏 柳	46	刘禹锡	乌衣巷
7	王之涣	凉州词	47	刘禹锡	望洞庭
8	王之涣	登鹳雀楼	48	刘禹锡	浪淘沙
9	孟浩然	春 晓	49	白居易	赋得古原草送别
10	孟浩然	宿建德江	50	白居易	忆江南
11	王 翰	凉州词	51	李 绅	悯农
12	王昌龄	出 塞	52	李 绅	悯农
13	王昌龄	从军行	53	杜 牧	山 行
14	王昌龄	芙蓉楼送辛渐	54	杜 牧	清 明
15	王 维	鹿 柴	55	杜 牧	江南春
16	王 维	竹里馆	56	杜 牧	秋 夕
17	王 维	送元二使安西	57	李商隐	乐游原
18	王 维	九月九日忆山东	58	温庭筠	商山早行
19	高 适	别董大	59	王安石	元 日
20	李 白	静夜思	60	王安石	泊船瓜洲
21	李 白	古朗月行	61	王安石	梅 花

22	李 白	望庐山瀑布	62	苏 轼	六月二十七日望湖
23	李 白	赠汪伦	63	苏 轼	饮湖上初晴后雨
24	李 白	独坐敬亭山	64	苏 轼	惠崇《春江晓景》
25	李 白	黄鹤楼送孟浩	65	苏 轼	题西林壁
26	李 白	早发白帝城	66	李清照	夏日绝句
27	李 白	秋浦歌	67	陆 游	示 儿
28	李 白	望天门山	68	陆 游	秋夜将晓出篱门迎
29	杜 甫	闻官军收河南河	69	杨万里	四时田园杂兴
30	杜 甫	绝句	70	杨万里	小 池
31	杜 甫	赠花卿	71	范成大	晓出净慈寺送林子
32	杜 甫	江南逢李龟年	72	朱 熹	春 日
33	杜 甫	春夜喜雨	73	辛弃疾	菩萨蛮·书江西造
34	杜 甫	绝句	74	林 升	题临安邸
35	杜 甫	江畔独步寻花	75	叶绍翁	游园不值
36	刘长卿	逢雪宿芙蓉山主	76	王 冕	墨 梅
37	柳宗元	江 雪	77	于 谦	石灰吟
38	贾 岛	寻隐者不遇	78	王 磐	朝天子·咏喇叭
39	张 继	枫桥夜泊	79	郑 燮	竹 石
40	张志和	渔歌子	80	龚自珍	己亥杂诗

1. 长歌行 汉乐府

青青园中葵，朝露待日晞。
阳春布德泽，万物生光辉。
常恐秋节至，焜黄华叶衰。
百川东到海，何时复西归。
少壮不努力，老大徒伤悲。

2. 七步诗 [三国]曹植

煮豆燃豆萁，漉豉以为汁。
萁在釜下燃，豆在釜中泣，
本是同根生，相煎何太急！

3. 敕勒歌 北朝民歌

敕勒川，阴山下。
天似穹庐，笼盖四野。
天苍苍，野茫茫。
风吹草低见牛羊。

4. 咏鹅 [唐]骆宾王

鹅，鹅，鹅，曲项向天歌。
白毛浮绿水，红掌拨清波。

5. 回乡偶书 [唐]贺知章

少小离家老大回，乡音无改鬓毛衰。

儿童相见不相识，笑问客从何处来。

6. 咏柳 [唐]贺知章

碧玉妆成一树高，万条垂下绿丝绦。

不知细叶谁裁出，二月春风似剪刀。

7. 凉州词 [唐]王之涣

黄河远上白云间，一片孤城万仞山。

羌笛何须怨杨柳，春风不度玉门关。

8. 登鹳鹊楼 [唐]王之涣

白日依山尽，黄河入海流。

欲穷千里目，更上一层楼。

9. 春晓 [唐]孟浩然

春眠不觉晓，处处闻啼鸟。

夜来风雨声，花落知多少？

10. 宿建德江 [唐]孟浩然

移舟泊烟渚，日暮客愁新。

野旷天低树，江清月近人。

11. 凉州词 [唐]王翰

葡萄美酒夜光杯，欲饮琵琶马上催。

醉卧沙场君莫笑，古来征战几人回？

12. 出塞 [唐]王昌龄

秦时明月汉时关，万里长征人未还。

但使龙城飞将在，不教胡马度阴山。

13. 从军行 [唐]王昌龄

青海长云暗雪山，孤城遥望玉门关。

黄沙百战穿金甲，不破楼兰终不还。

14. 芙蓉楼送辛渐 [唐]王昌龄

寒雨连江夜入吴，平明送客楚山孤。

洛阳亲友如相问，一片冰心在玉壶。

15. 鹿柴 [唐]王维

空山不见人，但闻人语响。

返景入深林，复照青苔上。

16. 竹里馆 [唐]王维

独坐幽篁里，弹琴复长啸。

深林人不知，明月来相照。

17. 送元二使安西 [唐]王维

渭城朝雨浥轻尘，客舍青青柳色新。

劝君更尽一杯酒，西出阳关无故人。

18. 九月九日忆山东兄弟 [唐]王维

独在异乡为异客，每逢佳节倍思亲。

遥知兄弟登高处，遍插茱萸少一人。

19. 别董大 [唐]高适

千里黄云白日曛，北风吹雁雪纷纷。

莫愁前路无知己，天下谁人不识君。

20. 静夜思 [唐]李白

床前明月光，疑是地上霜。

举头望明月，低头思故乡。

21. 古朗月行 [唐]李白

小时不识月，呼作白玉盘。

又疑瑶台镜，飞在青云端。

仙人垂两足，桂树何团团。

白兔捣药成，问言与谁餐。

22. 望庐山瀑布 [唐]李白

日照香炉生紫烟，遥看瀑布挂前川。

飞流直下三千尺，疑是银河落九天。

23. 赠汪伦 [唐]李白

李白乘舟将欲行，忽闻岸上踏歌声。

桃花潭水深千尺，不及汪伦送我情。

24. 独坐敬亭山 [唐]李白

众鸟高飞尽，孤云独去闲。

相看两不厌，只有敬亭山。

25. 黄鹤楼送孟浩然之广陵 [唐]李白

故人西辞黄鹤楼，烟花三月下扬州。

孤帆远影碧空尽，惟见长江天际流。

26. 早发白帝城 [唐]李白

朝辞白帝彩云间，千里江陵一日还。
两岸猿声啼不住，轻舟已过万重山。

27. 秋浦歌 [唐]李白

白发三千丈，缘愁似个长。
不知明镜里，何处得秋霜？

28. 望天门山 [唐]李白

天门中断楚江开，碧水东流至此回。
两岸青山相对出，孤帆一片日边来。

29. 闻官军收河南河北 [唐]杜甫

剑外忽传收蓟北，初闻涕泪满衣裳。
却看妻子愁何在，漫卷诗书喜欲狂。
白日放歌须纵酒，青春作伴好还乡。
即从巴峡穿巫峡，便下襄阳向洛阳。

30. 绝句 [唐]杜甫

两个黄鹂鸣翠柳，一行白鹭上青天。
窗含西岭千秋雪，门泊东吴万里船。

31. 赠花卿 [唐]杜甫

锦城丝管日纷纷，半入江风半入云。
此曲只应天上，人间能得几回闻？

32. 江南逢李龟年 [唐]杜甫

岐王宅里寻常见，崔九堂前几度闻。

正是江南好风景，落花时节又逢君。

33. 春夜喜雨 [唐]杜甫

好雨知时节，当春乃发生。

随风潜入夜，润物细无声。

野径云俱黑，江船火独明。

晓看红湿处，花重锦官城。

34. 绝句 [唐]杜甫

迟日江山丽，春风花草香。

泥融飞燕子，沙暖睡鸳鸯。

35. 江畔独步寻花 [唐]杜甫

黄四娘家花满蹊，千朵万朵压枝低。

留连戏蝶时时舞，自在娇莺恰恰啼。

36. 逢雪送芙蓉山主人 [唐]刘长卿

日暮苍山远，天寒白屋贫。

柴门闻犬吠，风雪夜归人。

37. 江雪 [唐]柳宗元

千山鸟飞绝，万径人踪灭。

孤舟蓑笠翁，独钓寒江雪。

38. 寻隐者不遇 [唐]贾岛

松下问童子，言师采药去。

只在此山中，云深不知处。

39. 枫桥夜泊 [唐]张继

月落乌啼霜满天，江枫渔火对愁眠。

姑苏城外寒山寺，夜半钟声到客船。

40. 渔歌子 [唐]张志和

西塞山前白鹭飞，桃花流水鳜鱼肥。

青箬笠，绿蓑衣，斜风细雨不须归。

41. 寒食 [唐]韩翃

春城无处不飞花，寒食东风御柳斜。

日暮汉宫传蜡烛，轻烟散入五侯家。

42. 滁州西涧 [唐]韦应物

独怜幽草涧边生，上有黄鹂深树鸣。

春潮带雨晚来急，野渡无人舟自横。

43. 塞下曲 [唐]卢纶

林暗草惊风，将军夜引弓。

平明寻白羽，没在石棱中。

44. 游子吟 [唐]孟郊

慈母手中线， 游子身上衣。

临行密密缝， 意恐迟迟归。

谁言寸草心， 报得三春晖。

45. 竹枝词 [唐]刘禹锡

杨柳青青江水平， 闻郎江上唱歌声。

东边日出西边雨， 道是无晴还有晴。

46. 乌衣巷 [唐]刘禹锡

朱雀桥边野草花， 乌衣巷口夕阳斜。

旧时王谢堂前燕， 飞入寻常百姓家。

47. 望洞庭 [唐]刘禹锡

湖光秋月两相和， 潭面无风镜未磨。

遥望洞庭山水色， 白银盘里一青螺。

48. 浪淘沙 [唐]刘禹锡

九曲黄河万里沙， 浪淘风簸自天涯。

如今直上银河去， 同到牵牛织女家。

49. 赋得古原草送别 [唐]白居易

离离原上草， 一岁一枯荣。

野火烧不尽， 春风吹又生。

远芳侵古道， 晴翠接荒城。

又送王孙去， 萋萋满别情。

50. 忆江南 [唐]白居易

江南好， 风景旧曾谙。

日出江花红胜火， 春来江水绿如蓝。

能不忆江南？

51. 悯农 [唐]李绅

锄禾日当午， 汗滴禾下土。

谁知盘中餐， 粒粒皆辛苦。

52. 悯农 [唐]李绅

春种一粒粟， 秋收万颗子。

四海无闲田， 农夫犹饿死。

53. 山行 [唐]杜牧

远上寒山石径斜， 白云深处有人家。

停车坐爱枫林晚， 霜叶红于二月花。

54. 清明 [唐]杜牧

清明时节雨纷纷， 路上行人欲断魂。

借问酒家何处有， 牧童遥指杏花村。

55. 江南春 [唐]杜牧

千里莺啼绿映红， 水村山郭酒旗风。

南朝四百八十寺， 多少楼台烟雨中。

56. 秋夕 [唐]杜牧

银烛秋光冷画屏， 轻罗小扇扑流萤。
天阶夜色凉如水， 坐看牵牛织女星。

57. 乐游原 [唐]李商隐

向晚意不适， 驱车登古原。
夕阳无限好， 只是近黄昏。

58. 商山早行 [唐]温庭筠

晨起动征铎， 客行悲故乡。
鸡声茅店月， 人迹板桥霜。
槲叶落山路， 枳花明驿墙。
因思杜陵梦， 凫燕满回塘。

59. 元日 [宋]王安石

爆竹声中一岁除， 春风送暖入屠苏。
千门万户曈曈日， 总把新桃换旧符。

60. 泊船瓜洲 [宋]王安石

京口瓜洲一水间， 钟山只隔数重山。
春风又绿江南岸， 明月何时照我还？

61. 梅花 [宋]王安石

墙角数枝梅， 凌寒独自开。
遥知不是雪， 为有暗香来。

62. 六月二十七日望湖楼醉书 [宋]苏轼

黑云翻墨未遮山， 白雨跳珠乱入船。
卷地风来忽吹散， 望湖楼下水如天。

63. 饮湖上初晴后雨 [宋]苏轼

水光潋滟晴方好， 山色空蒙雨亦奇。
欲把西湖比西子， 淡妆浓抹总相宜。

64. 惠崇《春江晓景》 [宋]苏轼

竹外桃花三两枝， 春江水暖鸭先知。
蒌蒿满地芦芽短， 正是河豚欲上时。

65. 题西林壁 [宋]苏轼

横看成岭侧成峰， 远近高低各不同。
不识庐山真面目， 只缘身在此山中。

66. 夏日绝句 [宋]李清照

生当作人杰， 死亦为鬼雄。
至今思项羽， 不肯过江东。

67. 示儿 [宋]陆游

死去元知万事空， 但悲不见九州同。
王师北定中原日， 家祭无忘告乃翁。

68. 秋夜将晓出篱门迎凉有感 [宋]陆游

三万里河东入海， 五千仞岳上摩天。

遗民泪尽胡尘里， 南望王师又一年。

69. 四时田园杂兴 [宋]范成大

昼出耕田夜绩麻， 村庄儿女各当家。
童孙未解供耕织， 也傍桑阴学种瓜。

70. 小池 [宋]杨万里

泉眼无声惜细流， 树阴照水爱晴柔。
小荷才露尖尖角， 早有蜻蜓立上头。

71. 晓出净慈寺送林子方 [宋]杨万里

毕竟西湖六月中， 风光不与四时同。
接天莲叶无穷碧， 映日荷花别样红。

72. 春日 [宋]朱熹

胜日寻芳泗水滨， 无边光景一时新。
等闲识得东风面， 万紫千红总是春。

73. 菩萨蛮 书江西造口壁 [宋]辛弃疾

郁孤台下清江水， 中间多少行人泪。
西北望长安， 可怜无数山。
青山遮不住， 毕竟东流去。
江晚正愁余， 山深闻鹧鸪。

74. 题临安邸 [宋]林升

山外青山楼外楼， 西湖歌舞几时休。
暖风熏得游人醉， 只把杭州作汴州。

75. 游园不值 [宋]叶绍翁

应怜屐齿印苍苔， 小扣柴扉久不开。
春色满园关不住， 一枝红杏出墙来。

76. 墨梅 [元]王冕

我家洗砚池头树， 朵朵花开淡墨痕。
不要人夸好颜色， 只留清气满乾坤。

77. 石灰吟 [明]于谦

千锤万凿出深山， 烈火焚烧若等闲。
粉骨碎身浑不怕， 要留清白在人间。

78. 朝天子 咏喇叭 [明]王磐

喇叭， 唢呐， 曲儿小， 腔儿大。
官船来往乱如麻， 全仗你抬身价。
军听了军愁， 民听了民怕，
那里去辨什么真共假？ 眼见的吹翻了这家，
吹伤了那家， 只吹的水尽鹅飞罢。

79. 竹石 [清]郑燮

咬定青山不放松， 立根原在破岩中。
千磨万击还坚劲， 任尔东西南北风。

80. 己亥杂诗 [清]龚自珍

九州生气恃风雷， 万马齐喑究可哀。

我劝天公重抖擞，不拘一格降人才。